補充資料

提婆達多驅趕醉象欲害佛的故事

《增壹阿含經》卷第九

聞如是:一時,佛在羅閱城迦蘭陀竹園所,與大比丘眾五百人俱。

爾時,王阿闍世有象,名那羅祇梨,極為兇弊暴虐,勇健能降外怨,緣彼象力,使摩竭一國, 無不靡伏。

爾時,提婆達兜便往至王阿闍世所。到已,而作是說:「大王當知,今此象惡,能除眾怨,可以醇酒,飲彼象醉。清旦,沙門瞿曇必來入城乞食,當放此醉象,蹋蹈殺之。」

時,王阿闍世聞提婆達兜教,即告令國中:「明日清旦,當放醉象,勿令人民在里巷遊 行。」

是時,提婆達兜告王阿闍世曰:「若彼沙門瞿曇有一切智,知當來事者,明日必不入城乞食。」王阿闍世曰:「亦如尊教,設有一切智者,明日清旦不入城乞食。」

爾時,羅閱城內男女大小事佛之者,聞王阿闍世清旦當放醉象害於如來,聞已,各懷愁憂,便往至世尊所,頭面禮足,在一面住,白世尊曰:「明日清旦,願世尊勿復入城!所以然者,王阿闍世今有教令,勅語城內人民之類:『明日勿復在里巷行來,吾欲放醉象,害沙門瞿曇。設沙門有一切智,明日清旦不入城乞食。』唯願世尊勿復入城,儻害如來,世人喪目,無復救護。」

世尊告曰:「止!止!諸優婆塞!勿懷愁惱。所以然者,如來之身非俗數身,然不為他人所害,終無此事。諸優婆塞當知,閻浮里註,地東西廣七千由旬,南北長二十一千由旬;瞿耶尼註,縱廣八千由旬,如半月形;弗于逮註,縱廣九千由旬,土地方正;欝單越註,縱廣十千由旬,土地圓如滿月。正使此四天下醉象滿其中,如似稻、麻、叢林,其數如是,猶不能得動如來毫毛,況復欲得害於如來?終無是處!

註1: 住須彌山四方鹹海之四大洲也。一南贍部洲 Jambudvipa,舊云南閻浮提。或從林立號,或以果立名。二東勝神洲,梵云東毘提訶 Pūrvavideha,舊云東弗婆提。為身形勝故,名為勝身。三西牛貨洲,梵云西瞿陀尼,舊云西瞿耶尼 Aparagodāniya,為貿易牛故,名為牛貨。四北瞿盧洲 Uttarakuru,舊云北鬱單越,譯曰勝處。於四洲中國土最勝,故名勝處。見西域記一,俱舍光記八。 FROM: 【佛學大辭典(丁福保)】

「則捨四天下,復有如千天下、千日月、千須彌山、千四海水、千閻浮提、千瞿耶尼、千弗于逮、千欝單越、千四天王、千三十三天、千燄天、千兜術天、千化自在天、千他化自在天,此名千世界;乃至二千世界,此名中千世界;乃至三千世界,此名三千大千世界;滿其中伊羅鉢龍王註2,猶不能動如來一毛,況復此象欲害如來哉?終無是處。所以然者,如來神力不可思議,如來出世,終不為人所傷害也。汝等各歸所在,如來自當知此變趣。」爾時,世尊與四部眾廣為說微妙之法。時,優婆寨、優婆斯聞正法已,各從坐起,頭面禮足,便退而去。

註 2: 【伊羅缽】 闡義鈔云:亦云伊羅跋羅。伊羅,樹名,此云臭氣。跋羅,此云極。謂此龍往昔由損此極臭樹葉,故致頭上生此臭樹,因即為名。

FROM:【翻譯名義集(南宋·法雲 著)】

爾時,世尊清旦著衣持鉢,欲入羅閱城乞食。是時,提頭賴吒天王註3將諸乾沓恕註4等,從東方來,侍從世尊。是時,毘留勒王註5將拘槃茶註6眾,侍從如來。西方毘留波叉註7將諸龍眾,侍從如來。北方天王拘毘羅註8將羅剎鬼眾,侍從如來。是時,釋提桓因將諸天人數千萬眾,從兜術天沒,來至世尊所,時,梵天王將諸梵天數千萬眾,從梵天上來至世尊所。釋、梵、四天王及二十八天註9,大鬼神王各各相謂言:「我等今日當觀二神,龍象共鬪,誰者勝負?」

註3:【提頭賴吒】Dhṛṭarāṣṭra,即持國天也。四天王之一。須彌之半,第四層之東。 為東方天主,守護東洲,故亦曰東方天。

註 4: 【乾沓和(乾闥婆)】又云犍沓和,健沓恕,八部眾之一。樂神名。

註5: 南增長天 Virūdhaka 之梵名。

註 6: 【鳩槃荼】Kumbhāṇḍa。鬼名。噉人精氣之鬼。譯作甕形鬼、冬瓜鬼。南方增長天王之領鬼。

註7: 西廣目天 Virūpākṣa 之梵名。

註 8: 北多聞天 Dhanada,又云 Vaiśramana 之梵名。

註 9: 三界共有二十八天,即欲界六天,色界十八天,無色界四天。

FROM: 【佛學大辭典(丁福保)】

時,羅閱城四部之眾遙見世尊將諸比丘入城乞食,時城內人民皆舉聲喚曰。王阿闍世復聞此聲,問左右曰:「此是何等聲響,乃徹此間?」

侍臣對曰:「此是如來入城乞食,人民見已,故有此聲。」

阿闍世曰:「沙門瞿曇亦無聖道,不知人心來變之驗。」王阿闍世即勅象師:「汝速將象飲以醇酒,鼻帶利劍,即放使走。」

爾時,世尊將諸比丘詣城門,適舉足入門。時,天地大動,諸神尊天在虛空中散種種華。時,五百比丘見醉象來,各各馳走,莫知所如。時,彼暴象遙見如來,便走趣向。侍者阿難見醉象來,在世尊後,不自安處,白世尊曰:「此象暴惡,將恐相害,宜可遠之。」

世尊告曰:「勿懼!阿難!吾今當以如來神力降伏此象。」

如來觀察暴象不近不遠,便化左右作諸師子王,於彼象後作大火坑。時,彼暴象見左右師子 王及見火坑,即失尿放糞,無走突處,便前進向如來。爾時,世尊便說此偈:

「汝莫害於龍, 龍現甚難遇, 不由害龍已, 而得生善處。」

爾時,暴象聞世尊說此偈,如被火燃,即自解劍,向如來跪雙膝,投地以鼻舐如來足。時, 世尊伸右手摩象頭,而作是說:

「瞋恚生地獄, 亦作蛇蚖形; 是故當捨恚, 更莫受此身。」

爾時,神尊諸天在虛空中,以若干百千種花散如來上。是時,世尊與四部之眾、天、龍、鬼神說微妙法。爾時,見降象男女六萬餘人諸塵垢盡,得法眼淨,八萬天人亦得法眼淨。時,彼醉象身中刀風起,身壞命終,生四天王宮。

爾時,比丘、比丘尼,諸優婆塞、優婆夷,及天、龍、鬼神,聞世尊所說,歡喜奉行。

提婆達多鎮山壓佛的因緣

《佛說興起行經》卷下 後漢外國三藏康孟詳譯

佛說地婆達兜擲石緣經第七

聞如是:一時佛在阿耨大泉,與大比丘眾五百人俱,皆是阿羅漢, 六通神足, 唯除一比丘阿 難也。

是時,佛告舍利弗:「往昔過去世,於羅閱祇城,有長者名曰須檀,大富,多饒財寶、象、馬、七珍、僮僕、侍使,產業備足。子名須摩提。其父須檀,奄然(忽然)命終。須摩提有異母弟,名修耶舍。摩提心念:『我當云何設計,不與修耶舍分?』須摩提復念:『唯當殺之,乃得不與耳。』須摩提語修耶舍:『大弟,共詣耆闍崛山上,有所論說去來。』修耶舍曰:『可爾。』須摩提即執弟手上山,既上山已,將至絕高崖頭,便推置崖底,以石塠(音力乂入,同「堆」,疊也。)之,便即命絕。」

佛語舍利弗:「汝知爾時長者須檀者不?則今父王真淨是也;爾時子須摩提者,則我身是; 弟修耶舍者,則今地婆達兜是。」

佛語舍利弗:「我爾時貪財、害弟,以是罪故,無數千歲,在地獄中燒煮、為鐵山所塠。爾時殘緣,今雖得阿惟三佛,故不能免此宿對。我於耆闍崛山經行,為地婆達兜舉崖石,長六丈、廣三丈,以擲佛頭。耆闍崛山神,名金埤羅,以手接石,石邊小片,迸墮中佛脚拇指,即破血出。」

於是,世尊即說宿命偈曰:

「我往以財故, 殺其異母弟, 以石塠其上。 推著高崖下, 以是因緣故, 久受地獄苦, 於其地獄中, 為鐵[[所塠。 由是殘餘殃, 地婆達下石, 崖片落傷脚, 破我脚拇指。 因緣終不朽, 亦不著虛空。 當護三因緣, 莫犯身口意。 今我成尊佛, 得為三界將, 阿耨大泉 申, 說此先世緣。」

註10: 阿耨大泉為一泉水之名。阿耨,為「阿耨達」之簡稱,意為無熱。

案:《佛說興起行經序》:「所謂崑崙山者(內典所謂香山是也。香山具名香醉山,在雪山之北。此山之南有無熱池,以為四大河之源。),則閻浮利地之中心也。山皆寶石,周匝有五百窟,窟皆黄金,常五百羅漢居之。阿耨大泉,外周圍山,山內平地,泉處其中。泉岸皆黃金,以四獸頭,出水其口。各逸一匝已,還復其方,出投四海。(池東面銀牛口,流出殑伽河,繞池一匝,入東南海。池南面金象口,流出信度河,繞池一匝,入西南海。池西面瑠璃馬口,流出縛芻河,繞池一匝,入西北海。池北面頗胝師子口,流出徙多河,繞池一匝,入東北海。或曰潛流地下,出積石山,即徙多河之流,為中國之河

源。)...(略)... 泉中有金臺,臺方一由延,臺上有金蓮華,以七寶為莖。如來將五百羅漢,常以月十五日,於中說戒。...(略)... 又阿耨泉中,非有漏、礙形所可周旋,唯有阿難為如來所接也。所以慇懃告舍利弗者,欲化諸龍故也。」又大地菩薩以願力故,化為龍王,於中潛宅,出清冷水。智度論七謂:「阿那婆達多龍王,是七佳大菩薩。」華嚴探玄記二曰:「阿那婆達多龍王,此云無熱惱。」

佛語舍利弗:「汝觀如來,眾惡已盡、諸善普具,諸天、龍、神、帝王、臣民、一切眾生, 皆欲度之,尚有宿緣,不能得免,況復愚冥、未得道者?舍利弗等,當學如是,莫犯身、口、 意。」

佛說是已,舍利弗及五百羅漢、阿耨大龍王、天、龍、鬼神、乾沓和、阿須倫、迦樓羅、甄 陀羅、摩休勒,聞佛所說,歡喜受行。

佛於 羅睺羅 及 提婆達多 平等慈心

《雜寶藏經》十力迦葉以實言止佛足血緣第八十

爾時如來,被迦陀羅刺刺其脚足,血出不止,以種種藥塗,不能得差。諸阿羅漢,於香山中,取藥塗治,亦復不降。十力迦葉,至世尊所,作是言曰:「若佛如來,於一切眾生,有平等心,於羅睺羅、提婆達多等無有異者,脚血應止。」即時血止,瘡亦平復。比丘歎言:「種種妙藥,塗治不止,迦葉實言,血則尋止。」

佛言:「非但今日,過去世時,亦復如是。昔有一婆羅門,生一子,名曰無害,而白父言: 『田中行時,莫害眾生。』父告子言:『汝欲作仙人耶?生活之法,云何避虫?』子言: 『我今望得父現世安樂、後世安樂,不用我語,用是活為?』即向毒龍泉邊而坐,欲求取死。 世有毒龍,見之害人。時婆羅門子,即見毒龍,毒遍身體,命即欲斷。父時憂惱,不知兒處, 尋即求覓。見兒欲死,父到兒所,而作是言:『我子從來,無害心者,此毒應消。』作是語 已,毒氣即消,平復如故。爾時父者,十力迦葉是也。爾時子者,我身是也。於過去世中, 能作實語,消除我病,於今現世,亦以實言而愈我病。」

關於提婆達多

《大方等無想經》卷第四 北涼天竺三藏曇無讖譯 …(略)…

爾時,眾中有婆羅門,名曰善德,白佛言:「世尊!如來之法,甚深祕密,為諸眾生,分別演說。而是薄福、鈍根、愚癡提婆達多,不聽不受,不知恩分,純與六群弊惡比丘,同其所行,增長地獄,出佛身血,破壞眾僧。生於釋種,增長憍慢,實非人類,強名為人,察其行迹,畜生無別。復從無量阿僧祇世,常於如來生惡逆心,其有施者,無有果報,自所修善,亦不成就,如尼乾子註口等無差別。尼乾子說無受、無施,提婆達多,亦復如是,真是魔黨,非佛眷屬。何以故?常於如來,起害心故。雖名沙門,無沙門義。猶如袈裟裹覆利刀,實是禿人註口,名為無命,所有徒眾,亦復如是。實非世尊,作世尊想。世尊如來,若是一切智者,何故聽此弊惡之人,出家剃髮,受具足戒?如來所說,普令眾生生於善根,是人何故獨不得至如來慈哀,常以樂說,為諸眾生,廣宣正法,聞者蒙潤,善根開敷。提婆達多,何故不得預斯利益?如來性淨、身淨、心淨、眷屬應淨,何故眾中,而有此輩?」

註11:【尼乾子外道】印度古代六師外道之一,此外道因以修苦行,離世間之衣食束縛,而期遠離煩惱之結與三界之繫縛,故有離繫、不繫等譯名。又此外道不以露形為恥,故世人貶稱為無慚外道、裸形外道。開祖為勒沙婆,至尼乾陀若提子時,為中興之祖。後世則稱之為書那教。尼乾陀若提子入寂後,此外道分成空衣、白衣二派。空衣派主倡不著衣而裸體生活,一般稱為裸形外道、露形外道。白衣派則流行於北印度之僧訶補羅國一帶,為避寒氣而著白衣,此或即其分裂為二派之原因。見《成唯識論述記》卷一。

FROM: 【唯識名詞白話新解(于凌波居士著)】

註12:經中斥破戒無行之比丘,謂之禿人,又云禿居士。以彼雖剃髮而無出家沙門之行,但是禿頭之俗人禿頭之居士耳。涅槃經三曰:「破戒不護法者名禿居士。」

又,《十輪經》卷三:「如是破戒惡行苾芻,雖於我法毘奈耶中名為死尸,而有出家戒德餘勢。譬如牛麝身命終後,雖是無識傍生死尸,而牛有黃,而麝有香,能為無量無邊有情作大饒益。破戒苾芻亦復如是,雖於我法毘奈耶中名為死尸,而有出家戒德餘勢,能為無量無邊有情作大饒益。」

同卷三:「大梵!譬如燒香,其質雖壞,而氣芬馥熏他令香。破戒苾芻亦復如是,由破戒故非良福田;雖恒晝夜信施所燒,身壞命終墮三惡趣,而為無量無邊有情作大饒益,謂皆令得聞於生天涅槃香氣。是故大梵!如是破戒惡行苾芻,一切白衣皆應守護、恭敬、供養。我終不許諸在家者,以鞭杖等捶拷其身,或閉牢獄、或復呵罵、或解支節、或斷其命。我唯許彼清淨僧眾,於布薩時、或自恣時驅擯令出。一切給施四方僧物、飲食、資具不聽受用;一切沙門毘奈耶事,皆令驅出不得在眾。而我不許加其鞭杖,繫縛斷命。」

同卷四:「然未來世,有剎帝利旃荼羅王、宰官、居士、長者、沙門、婆羅門等旃荼羅人,心懷毒惡,無有慈愍,造諸罪業過惡醉象,愚癡、傲慢、斷滅善根。於歸我法而出家者,若是法器、若非法器,剃除鬚髮被服袈裟諸弟子所,不生恭敬,惱亂呵罵,或以鞭杖楚撻其身,或閉牢獄乃至斷命。此於一切過去、未來、現在諸佛,犯諸大罪,斷滅善根焚燒相續,一切智者之所遠離,決定當生無間地獄。若剎帝利旃荼羅王,乃至沙門、婆羅門等旃荼羅人,成就如是第三惡輪。由此因緣,令護國土一切天、龍、藥叉神等,信敬三寶無動壞者,於剎帝利旃荼羅王,乃至沙門、婆羅門等旃荼羅人,心生瞋忿。廣說乃至,彼剎帝利旃荼羅王、宰官、居士、長者、沙門、婆羅門等旃荼羅人,不久便當支體廢缺,於多日夜結舌不言,受諸苦毒痛切難忍,命終定生無間地獄。」

爾時,大雲密藏菩薩,承佛神力,語善德言:「善哉善哉!大婆羅門、一切聲聞、辟支佛等, 於是事中,都不能問;汝今乃能諮問是義。至心諦聽!我當承佛威神、道力,為汝廣說。

「汝不應言提婆達多不知恩分。是人知恩,非不知也。雖與六群,同其所行,不名為惡。提婆達多,不可思議,所修業行,皆同如來。如來業行,即是提婆達多業行。一切眾生,不能開顯如來、世尊真實功德;提婆達多能開示人,令阿僧祇無量眾生,安住善根。如來業行,非地獄種,云何而言提婆達多是地獄人?汝言同於六群所行。汝今當知,六群比丘,實非弊惡,所行之法,亦同佛行。

「大婆羅門!如來身血,實無有出,提婆達多亦不能出。若言樹影有出血者,無有是處。如來之身,亦復如是。若言出血,當知即是善權方便、不可思議。大婆羅門!釋迦如來種姓,清淨如紺琉璃,所有弟子,無有毀禁。我亦不見,如來弟子有破戒者。如來所說,無上正法,實令聞者,生於善根,非不生也。如來大眾,成就持戒,悉入佛境,徒眾、眷屬,如栴檀林,純以栴檀而為圍遶,不可沮壞,如金剛山,亦不見有能沮壞者。有怖畏者,則可破壞;如來弟子,永無憂怖,若無憂怖,云何可壞?不可破壞,如師子群,如來法王,如師子王,純以師子而為眷屬。如是眷屬,難可測度,非是聲聞、緣覺境界,不可毀滅,如灰覆火註13。如來無上一切智人,若聽剃髮,受具戒者,終無毀禁。一切眾生,皆入如來所知境界,是故如來名一切智。提婆達多,具足如是,不名壞僧。

註 13: 「如灰覆火」之完整詞句,如《大般涅槃經》卷第九:「如灰覆火,愚夫輕蹈。 初雖不覺;後便被燒。」

「大婆羅門!假使千萬無量諸魔,亦不能壞。若言弊惡提婆達多壞眾僧者,當知即是善方便也,云何而言行同畜生?提婆達多,真實生於釋迦如來淨種姓中,不生畜生。若言釋種作諸惡者,無有是處。提婆達多所行惡行,為欲顯示釋迦如來功德力故。釋種中生名禿人者,亦無是處。提婆達多,善能護持解脫淨戒,云何而言尼乾子耶?有惡欲者乃名惡人,提婆達多心無惡欲,云何而言惡比丘耶?修行如來善方便者,提婆達多即其人也。

「大婆羅門!若有人言:『提婆達多集地獄業。』當知即是菩薩業也!菩薩業者,即是神通, 為化眾生,故在地獄,當知實亦不處地獄。譬如二人,道路共行,後各別去,一東一西。若 言是人,故和合者,亦無是處;若言如來、提婆達多,相遠離者,亦無是處。

「大婆羅門!有人殺生,造作惡業,法應無量百千世中,地獄受果;有人修善,法應無量百千世中,天上受報。有修善者,地獄受果;行惡之人,天上受報。此乃諸佛如來境界,非諸聲聞、緣覺所知。如來成就無量、微妙、真實功德,云何而言提婆達多能壞佛身?實無量世中,於如來所,生惡逆心,提婆達多實無害心。何以故?是人真實決定,了知善惡報故。知一念惡,無量世中,地獄受報。以是義故,提婆達多,終不造惡。

「如來已於無量世中,永斷諸惡,云何眾生能於如來起惡心耶?若言:『提婆達多是地獄人。』云何得與如來法王同一種姓?地獄眾生得與如來同眷屬者,亦無是處。若言:『提婆達多,無量世中,造作諸惡,應無量世,地獄受報。』云何得與如來一處?若與如來同一處者,當知是人,非是弊惡。若提婆達多真實惡人,云何得與如來和合?

「如彼二人,東、西路乖,理無和合。提婆達多隨順佛語,聞東則東,不違聖旨,云何當名 地獄人耶?若令至東,故違西去,則不得名非地獄人。若言:『提婆達多地獄人』者,是無 惡人。所以者何?地者,名人;獄者,名天;往來人天,名地獄人。復次!地者,名常;獄 名無相,提婆達多亦常無相,故名地獄。復次!地,名為樂;獄者,名斷;樂斷生死,故名 地獄。復次!地者,名善方便;獄,名能說善方便,故名地獄。

「大婆羅門!如來世尊有善方便,復能宣說不名地獄,云何得名提婆達多為地獄人?提婆達

多所有境界,實非聲聞、緣覺所知。大婆羅門!如來世尊,常所稱讚『黃頭大士』,即是提婆達多比丘。六群比丘,亦大菩薩,提婆達多與共同行,云何得名地獄人耶?如栴檀樹,栴檀圍遶;如香象蹴踏,非驢所堪,還是香象之所能忍。大婆羅門!如來、世尊、大香象王,亦復如是。所說深義,非是二乘之所能知,還是香象諸大菩薩,乃能受持。提婆達多,成就如是無量功德,汝應懺悔、恭敬、供養、尊重、讚歎。

「大婆羅門!若比丘、比丘尼、優婆塞、優婆夷,能知提婆達多功德,了了不疑,當知是人, 真佛弟子,得佛功德二分之一,得佛一目,得佛半身。大婆羅門!提婆達多所有功德,一切 眾生,所不能知;如來功德,所有境界,一切眾生,亦不能知,復不能見如來法身。

「大婆羅門!提婆達多,真實能知,如來所有微妙功德,聲聞、緣覺實所不知。惟有提婆達多,了了不疑,亦能示現如來所現無量神通,能示眾生如來所行,知佛如來所有國土。提婆達多,是大丈夫,如來所遊,在在處處,提婆達多,亦隨逐行。以是義故,名大丈夫。諸佛如來,境界甚深,祕密之言,不可思議!惟有提婆達多比丘,能得了知。」

《妙法蓮華經》卷第四

提婆達多品第十二

佛告諸比丘:「...(略)... 由提婆達多善知識故,令我具足六波羅蜜,慈悲喜捨,三十二相, 八十種好,紫磨金色,十力、四無所畏、四攝法、十八不共神通道力,成等正覺,廣度眾生, 皆因提婆達多善知識故。」

告諸四眾:「提婆達多却後過無量劫,當得成佛,號曰天王如來、應供、正遍知、明行足、善逝、世間解、無上士、調御丈夫、天人師、佛、世尊。世界名天道。時天王佛住世二十中劫,廣為眾生說於妙法,恒河沙眾生得阿羅漢果,無量眾生發緣覺心,恒河沙眾生發無上道心,得無生忍,至不退轉。時天王佛般涅槃後,正法住世二十中劫。全身舍利起七寶塔,高六十由旬,縱廣四十由旬,諸天人民,悉以雜華、末香、燒香、塗香,衣服、瓔珞、幢幡、寶蓋,伎樂、歌頌,禮拜供養七寶妙塔。無量眾生得阿羅漢果,無量眾生悟辟支佛,不可思議眾生發菩提心,至不退轉。」

佛告諸比丘:「未來世中,若有善男子、善女人,聞妙法華經提婆達多品,淨心信敬不生疑惑者,不墮地獄、餓鬼、畜生,生十方佛前,所生之處,常聞此經。若生人天中,受勝妙樂,若在佛前,蓮華化生。」